

Morning Regional Dogri News Bulletin, 17 May 2024

मार्निंग डोगरी न्यूज़ बुलेटिन, समें. 09.20 Hrs

<><><><><><>

Headlines

गृह मंत्री अमित शाह होर कल कश्मीर पुज्जे जित्थे उनें नेकां प्रतिनिधिमंडलें कन्नै मलाटी कीती।

उपराज्यपाल मनोज सिन्हा होरें देश-विदेश थवां श्रद्धालुएं गी श्री अमरनाथ जातरा आस्तै साद्दा दिता ऐ ते उनेंगी भागवत दा संदेश फैलाने दा आह्वान कीता ऐ।

लोकसभा चुनाएं दे बाकी मरहलें आस्तै चुनां प्रचार जोरें-शोरें कन्नै चला करदा ऐ। जम्मू-कश्मीर च बारामुला ते अनंतनाग-राजौरी हल्कें च 5में ते 6में गेड़ च वोट पाए जाडन।

प्रधानमंत्री होरें आखेआ ऐ जे जम्मू-कश्मीर गी राज्य दा दर्जा देना साहड़ी बचनबद्धता ऐ ते एहदी बहाली लेई मुनासिब समें दा इंतजार ऐ।

<><><><><><>

Amit-Shah Srinagar

केंद्री गृह मंत्री अमित शाह होर मेद ऐ जे अज्ज श्रीनगर च सुरक्षा स्थिति दा जायजा लैडन।

केंद्री गृह मंत्री होर 2 दिन दे दौरें पर कल पुज्जे हे। उनें बक्ख-बक्ख प्रतिनिधिमंडलें ते पार्टी

कार्जकर्ताएं कन्नै मलाटी कीती। भारतीय जनता पार्टी दी मुकामी इकाई दे महासचिव सुनील

शर्मा होरें आखेआ जे शाह हुंदा कश्मीर दौरा सियासी नेई ऐ।

उनेगी इस दौरान जम्मू-कश्मीर दे सुरक्षा अधिकारिण आस्सेया चला रदे लोकसभा चुनां ते औंदी सलाना श्री अमरनाथ जी दी जातरा दे मद्देनजर सुरक्षा स्थिति बारे जानकारी दिती जाग। इस बारे सलाना श्री अमरनाथ जी दी यात्रा 29 जून गी शुरू होआ रदी ऐ ते एह यात्रा 19 अगस्त गी रक्खड़ पुन्नेया आहले दिन सम्पन्न होई जाग। केई सारे प्रतिनिधिमंडलें जिंदे पहाड़ी, गुज्जर ते बकरवाल, सिख, करनाह, कुपवाड़ा, सरपंचें ते किश लोकें उंदे कन्नै मलाटी कीती।

<><><><><><>

Campaign-Schedule

लोकसभा चुनां दे बाकी रौहंदे चरणें लेई चुनां प्रचार जोरें-शोरें कन्नै जारी ऐ। बक्ख-बक्ख सियासी पार्टिण दे नेता मुल भरै च रैलियां करा रदे न तां जे मतदाताएं गी अपने पक्ख च कीता जाई सकै। जम्मू-कश्मीर दी बारामूला ते अनंतनाग राजौरी सीट लेई 5में ते 6में गेड़ च चुनां होना ऐ। बारामूला लोकसभा हल्के च 20 मेई गी 5में गेड़ तैहत वोट पाए जाडन जिसले कि अनंतनाग राजौरी सीट लेई 25 मई गी 6में गेड़ तैहत मतदान होग। वोटें दी गितरी आला कम्म 4 जून गी होना ऐ। बारामूला पार्लियामानी हल्के लेई 20 मेदवार चुनां मैदान च न, पर मुख मुकाबला नेशनल कांफ्रेंस दे नेता उमर अब्दुल्ला ते जेल च बंद इंजीनियर रशीद हुंदे बश्कार मन्नेया जा रदा ऐ।

अनंतनाग च मुख्ख मुकाबला साबका मुख्खमंत्री ते पीडीपी प्रमुख्ख महबूबा मुफ्ती ते नेशनल कांफ्रेंस दे मियां अल्ताफ ते अपनी पार्टी दे मेदवार जफर मन्हास हुंदे बश्कार मन्नेआ जा रदा ऐ।

<><><><><><>

Voter-Turn out

तुसेंगी जेकर क्रिकेट दे महान खडारी ते भारती चुनां आयेग दे आइकॉन सचिन तेंदुलकर हुंदे थवां मौजूदा लोकसभा चुनां च वोट पाने दी अपील करने दी काल आवै तां तुस हैरान नैई होवेयो। मतदान दा प्रतिशत बदाने आस्तै चुनांअ आयोग नै नेकां हीले शुरू कीते न। पैहले चउं मरहलें च अजें तोड़ी 66.9-3 प्रतिशत मतदान दर्ज कीता गेआ ऐ ते तकरीबन 45 करोड़ 10 लक्ख लोकें वोट पाए न। एदे अलावा मोबाइल ते दूर संचार दिएं बक्ख-बक्ख कंपनिं राएं ते आई.पी.एल मैचें च बी लोकें गी मतदान करने ताई जागरूक बनाया जा रदा ऐ। राष्ट्रपति, उप-राष्ट्रपति ते भारत दे मुख्ख न्याधीश हुंदे समेत नेकां प्रमुख्ख संविधानिक ओहदें पर बैठे दे व्यक्तिं आस्सेया बी इस सरबंधै च अपील कीती जा रदी ऐ।

<><><><><><>

Infiltration-Bid

कुपवाड़ा जिले दे तंगधार सैक्टर च सेना नै घुसपैठ दी इक कोशिश गी नाकाम बनांदे होई 2 घुसपैठियें गी मारी मकाया ऐ। रिपोर्ट मुजब सेना नै घुसपैठियें गी चेतावनी दिती ते परतौने लेई आखेआ पर ओह नैई मन्ने। दौने बश्कार गोलीबारी होई जेदे चलदे 2 घुसपैठिए मारे गए। अधिकारिं गलाया जे 2 लोथां बाडबंदी दे दुई भेठा दिक्खियां गेइयां।

अधिकारिणं दस्सेया ऐ जे 4-5 घुसपैठिणं दा समूह घुसपैठ करने दी कोशिश करा रदे हे पर कब्जा रेखा पर तैनात सौहगे सुरक्षाबलें उनेंगी ललकारेआ। तोआई कुपवाड़ा जिले च सुरक्षाबलें आस्सेया सांझे तौर पर चलाए गेदे तपाशी अभियान दौरान आतंकवादिणं दे सहायक गी गिरफ्तार कीता गेआ ते खरी मती गिनतरी च असला ते बरूद बरामद कीता गेआ।

<><><><><><>

Statehood-PM

प्रधानमंत्री नरेंद्र मोदी होरें आखेआ ऐ जे जम्मू-कश्मीर दा राज्य दा दर्जा परतिए बहाल करने दा भरोसा संसद च दोहराया गेआ हा। एह उंदी प्रतिबद्धता बी ऐ, पर एदे लेई सेई समें गी बलगेया जा रदा ऐ। उनें श्रीनगर पार्लियामानी हल्के च रिकार्ड 36 फीसद होए दे मतदान दी बी सराहना कीती। उनें आखेआ जे एह इक उत्सव आला लेखा हा जित्थे लोक गा रदे हे। तालिया, बजा रदे हे, चा पला, रदे हे ते लोकतंत्र गी मना करदे हे। इक निजी टी.वी चैनल गी दित्ते गेदे इंटरव्यू च मोदी होरें आखेआ जे संसद च इस गल्ला दा भरोसा दोआया गेआ हा जे जम्मू-कश्मीर दा राज्य दा दर्जा बहाल कीता जाग पर सेई समें गी बलगेआ जा रदा ऐ। प्रधानमंत्री होरें श्रीनगर लोकसभा सीट पर 36 फीसद मतदान गी संदोख आली गल्ल दस्सेया। उनें आखेआ जे एहदे कन्नै साबित हुंदा ऐ जे सरकार दियां नीतियां सेई न ते धार्मिक आधार पर कोई फर्कोफर्की नेई ऐ।

<><><><><><>

EAM-Jaishankar

विदेश मंत्री ते बीजेपी दे सिनियर नेता एस. जयशंकर होरें फही आखेआ ऐ जे पाक मकबूजा कश्मीर भारत दा हिस्सा ऐ। कल नासिक च विश्वबंधु भारत कार्यक्रम च बोलदे होई जयशंकर होरें भारत दी कारवाइएंगी सीमित करने सरबंधी लक्ष्मण रेखा दे विचार गी खारिज करी दिता। भारत आस्सेआ पी.ओ.जे.के गी अपने कन्नै मलाने दी कोशिश पर चीन थवां प्रतिक्रिया दे बारे च पुच्छे गेदे सुआल पर मंत्री होरें आखेआ जे पी.ओ.जे.के भारत दा हिस्सा ऐ जेड़ा कुसै दी कमजोरी कारण अस्थाई रूपै च स्हाड़े थवां खिसकी गेदा हा। मुजफ्फराबाद च होए दे हाल दे विरोध प्रदर्शनें दा जिक्र करदे होई उनें आखेआ जे पी.ओ.जे.के दे बसनीकें अपनी दुख-तकलीफें ते दुरव्यवहार पर सुआल पुट्टना शुरू करी दिता ऐ। कनाडा कन्नै भारत दी कुटनीतिक चुनौतिएं दा जिक्र करदे होई जयशंकर होरें आखेआ जे अभिव्यक्ति दी आजादी गी अलगाववाद दे समर्थन ते हिंसा दी वकालत आस्तै इस्तेमाल नई कीता जाई सकदा। उनें आखेआ जे कनाडा अपने वोट बैंक दी खातिर खालिस्तानी तत्वें दी हिमायत करै करदा ऐ।

<><><><><><>

Lecture

बक्ख-बक्ख बमारिएं दी रोकथाम बारे महिलाएं गी जागरूक करने आस्तै नगरोटा मिलिटरी स्टेशन च इक लेक्चर ते गल्लबात दा सत्र लाया गेआ। एह लेक्चर डॉ. आयुष खजुरिया होरें दिता।

भाषा दियां आभा दियां जोनल प्रधान डॉक्टर रीना सचदेव होर इस मौके मुख अतिथि हिया।
इस मौके पर स्वस्थ परिवार सुखी परिवार विशे पर दौ भाषाएं च इक किताब बी जारी कीती
गेई। समारोह च तकरीबन डेढ सौ परिवारें हिस्सा लैता।

<><><><><><>

PMKKKY

खनन थवां प्रभावित इलाकें दे चवक्खे विकास बक्खी इक बड्डी गें पुट्टदे होई राजौरी दे जिला
विकास कमिशनर ओम प्रकाश भगत होरें कल इक बैठक च प्रधानमंत्री खनिज क्षेत्र कल्याण
योजना दी सलाना कार्रवाई योजना पर सोच-विचार कीता। इस स्कीम दा मकसद खनन थवां
प्रभावित इलाकें च विकास परियोजनाएं गी लागू करना ऐ तां जे खनन थवां पैहले ते ओदे
मगरा इनें इलाकें दे लोकें दी सेहत, पर्यावरण ते समाजी ते आर्थिक सरबंधी माड़े असर गी घट्ट
कीता जाई सकै ते उंदी टिकाऊ जीविका गी यकीनी बनाया जाई सकै।

<><><><><><>

GDC-Kishtwar

गौरमेंट डिग्री कॉलेज किशतवाड़ दी एनएनएस यूनिट ते सीईओ क्लब पास्सेया प्रदूषण
नियंत्रण कमेटी दे सहयोग कन्नै कल इक सेमीनार दा सरिस्ता कीता गेआ जेदा विशे हा
प्लास्टिक कचरे दा वातावरण उप्पर माड़ा असर ते एहदे प्रबंधन दे तरीके।

इस मौके प्रदूषण नियंत्रण कमेटी किशतवाड़ दे डिविजनल अफसर डॉ. मोहन सनेही होंरें मुख
भाषण दिता ते पर्यावरण गी प्लास्टिक कचरे थवां होने आले नुकसान पर लौ पाई। सेमीनार
च तकरीबन 150 विद्यार्थिएं हिस्सा लैता।

<><><><><><>

Manika-Batra

भारत दी नंबर 1 टेबल टेनिस खडारन मनिका बत्रा ते तजुर्बेकार शरथ कमल पेरिस ओलंपिक
2024 लेई 6 मैम्बरी भारती टेबल टेनिस टीम दी अगुवाई करडन। भारती टेबल टेनिस महासंघ
आस्सेआ कल टीम दी घोषणा कीती गेई।

<><><><><><>